


U ovom broju, između ostalog, čitajte:

- **Održana XXIII redovna Skupština Udruženja poslodavaca u FBiH**
- **Neophodno usvajanje izmjena i dopuna Zakona o zapošljavanju stranaca u FBiH**
- **Nove mjere za stabilizaciju cijena osnovnih životnih namirnica u Federaciji BiH**
- **Odgovor Ministarstva rada i socijalne politike FBiH u vezi neradnih dana povodom 01. maja, Praznika rada**
- **Predstavljen Projekat "Digitalna Europa", jedan od partnera u konzorciju i UPFBiH**
- **UPFBiH učestvuje u implementaciji projekta "Jačanje veze između politika tržišta rada, javnih službi za zapošljavanje i poslovne potražnje"**



Održana sjednica Upravnog odbora Udruženja poslodavaca u FBiH



Na sjednici Upravnog odbora Udruženja poslodavaca u FBiH, održanoj 20. aprila 2026. godine, članovi su usvojili materijale za predstojeću Skupštinu Udruženja, odnosno zapisnik sa prethodne sjednice Skupštine, Prijedlog izvještaja o radu UPFBiH za 2025. godinu, Prijedlog plana rada UP FBiH za 2026. godinu, Prijedlog finansijskog izvještaja UP FBiH za 2025. godinu i Prijedlog finansijskog plana za 2026. godinu.

Na sjednici je član ESV-a FBiH Adnan Smailbegović prezentirao inicijativu o reindustrijalizaciji i potrebnim mjerama koje se trebaju provesti. Članovi su na jednoj od prethodnih sjednica već prihvatili ovu inicijativu i ocijenili je veoma potrebnom, a na današnjoj su je usvojili kao i prihvatili informaciju o potrebnim mjerama. Inicijativa će biti prezentirana i na Skupštini UPFBiH.

Članovi su također usvojili i Prijedlog izmjena i dopuna Statuta UPFBiH, Prijedlog izmjena i dopuna odluke o visini članarine u UPFBiH, Prijedlog prečišćenog teksta Statuta i Prijedlog prečišćenog teksta Odluke o visini članarine u UPFBiH, kao i raspravljali o razješenju postojećeg i imenovanju novog člana Upravnog odobra. O ovim tačkama će se raspravljati na Skupštini UPFBiH.

Članovi su također zauzeli stav u vezi prijedloga Sindikata za utvrđivanje najniže neto satnice u Granskom kolektivnom ugovoru za djelatnost hemije i nemetala, kao i razmatrali inicijativu Udruženja poslodavaca BPK o ukidanju primjene odluka o neradnim danima tokom obilježavanja državnih i međunarodnih praznika. Zaključeno je da će inicijativa Udruženja poslodavaca BPK biti upućena prema nadležnim institucijama.

Održana XXIII redovna Skupština Udruženja poslodavaca u Federaciji BiH



U Sarajevu je, u prisustvu velikog broja predstavnika vlasti, sindikata, domaćih i stranih vladinih i nevladinih institucija i organizacija, akademske zajednice, poslodavaca i medija održana XXIII redovna Skupština Udruženja poslodavaca u Federaciji Bosne i Hercegovine, na kojoj su razmatrani ključni dokumenti

i prioriteti rada Udruženja kao i najvažnija pitanja za unapređenje poslovnog ambijenta u Federaciji BiH.

Delegati Skupštine usvojili su izvještaje o radu i poslovanju UPFBiH za 2025. godinu, uz prezentaciju realizovanih i tekućih projekata, kao i Plan rada i poslovanja za 2026. godinu, čime je potvrđen kontinuitet stabilnog i transparentnog funkcionisanja Udruženja.

"Udruženje iz godine u godinu raste i razvija se, a kroz naše članstvo pokrivamo čitavu Federaciju BiH. Samo tokom prethodne godine Udruženju je pristupilo više od stotinu kompanija, privrednih društava i obrta iz finansijskog sektora, kao i iz djelatnosti upravljanja, proizvodnje električne energije, građevinarstva,



obrazovanja, hotelijerstva, trgovine, prerađivačke industrije, uslužne djelatnosti, nekretnina, igara na sreću, posredovanja u zapošljavanju, zdravstva, finansija i administrativne djelatnosti. Naše članice zapošljavaju oko 45% ukupnog broja zaposlenih radnika u realnom sektoru, što

jasno govori o našoj ulozi i odgovornosti u ekonomskom sistemu", kazao je predsjednik Skupštine UPFBiH Amel Kovačević.

Govoreći o izazovima sa kojima se suočava privreda, Kovačević je istakao da Bosna i Hercegovina i dalje propušta značajne razvojne prilike te da kao država još uvijek nismo stvorili uvjete za povlačenje sredstava Europske unije, čime stotine miliona eura ostaju nedostupne našoj privredi i direktno utiču na njenu konkurentnost.



Predsjednik Upravnog odbora UPFBiH Nihad Imširović, naglasio je važnost očuvanja nezavisnosti i kontinuiteta djelovanja Udruženja.

"Tokom više od dvije decenije rada očuvali smo stručni integritet i jasno se ogradili od političkih utjecaja,

što nam omogućava da djelujemo kao odgovoran i pouzdan socijalni partner. Naši prioriteti bit će usmjereni na rasterećenje privrede, pravedniju raspodjelu tereta poslovanja, jačanje socijalnog dijaloga i unapređenje poslovnog ambijenta, izmjene propisa i prilagodbe u skladu sa interesima poslovanja u BiH, ali i prema vani" kazao je Imširović.

U fokusu budućih aktivnosti također će bit unapređenje pravnog okvira i rješavanje konkretnih prepreka sa kojima se suočava privreda.

"Poboljšanje pravnog okvira vezano je za pitanja carine, špedicije, digitalizaciju, rad naših radnika, a posebno vozača u zemljama EU, ulazak u jedinstven sistem plaćanja u eurima (SEPA), ulazak u sistem CBAM-a, olakšane procedure za rješavanja pitanja rada i boravka stranaca u BiH, rješavanja pitanja državne imovine u funkciji investicija i privrednog razvoja, te brojna druga pitanja vezana za Plan rasta i reformsku agendu, samo su neka od otvorenih pitanja sa kojima se Bosna i Hercegovina suočava i čije je rješavanje ključno za unapređenje poslovnog ambijenta, jačanje konkurentnosti i ubrzanje ekonomskog razvoja" rekao je Imširović.

U okviru sjednice predstavljena je i inicijativa za reindustrijalizaciju, koja ima za cilj jačanje

domaće proizvodnje i izvoza, unapređenje konkurentnosti i stvaranje održivog ekonomskog rasta.



„Poslodavci prepoznaju reindustrializaciju Bosne i Hercegovine kao jedan od ključnih razvojnih pravaca u narednom periodu. Bosna i Hercegovina, odnosno FBiH najveći privredni i ekonomski iskorak radila je kroz privredne uspjehe u metalnoj, hemijskoj, drvnoj, tekstilnoj i drugim industrijskim granama i

vjerujemo da ta iskustva i rješenja i dalje mogu biti osnov privrednog i ekonomskog razvoja u zemlji" kazao je član ESV-a FBiH Adnan Smailbegović.

Tokom Skupštine učesnicima su se obratile brojni delegati i zvanice, a predsjednik ESV-a FBiH Safudin Čengić je istakao važnost sistemskog djelovanja ovog tijela koje je uspostavljeno u skladu sa međunarodnim i domaćim standardima.

„Veliki doprinos usklađivanju interesa socijalnih partnera, odnosno vlasti, sindikata i poslodavaca daje se kroz rad Ekonomsko-socijalnog vijeća i na Skupštini UPFBiH koristim priliku da zahvalim poslodavcima koji su bili najuporniji na pokretanju ovog važnog kvoruma. Nakon rada na pitanjima fiskalne politike i politike plaća,



trgovine i drugo, trenutno ESV FBiH radi na pripremi propisa iz oblasti zdravstvenog osiguranja i kontole korištenja i zloupotreba bolovanja" kazao je predsjednik ESV-a FBiH Safudin Čengić.

Predstavnici sinidkata naglasili su važnost poboljšanja poslovnog ambijenta i unapređenja konsultacija i usaglašavanje granskih kolektivnih ugovora te zehvalili Udruženju na dobrom

ekonomsko-socijalnom dijalogu, direktno ili unutar ESV-a FBiH.

Udruženje poslodavaca u FBiH će i u narednom periodu nastaviti insistirati na konkretnim rješenjima koja će unaprijediti poslovni ambijent i konkurentnost domaće privrede, uz jači pritisak prema svim nivoima vlasti da se ključne reforme u oblasti fiskalne politike, radno-pravnog zakonodavstva, industrije, trgovine, digitalizacije i modernizacije poslovanja ne odgađaju.



Neophodno usvajanje izmjena i dopuna Zakona o zapošljavanju stranaca u FBiH

Udruženje poslodavaca podržava usvajanje Zakona o izmjenama i dopunama Zakona o zapošljavanju stranaca u FBiH koji je na dnevnom redu Doma naroda Parlamenta FBiH na sutrašnjoj sjednici.



Zakon o zapošljavanju stranaca, usvojen je još 2012. godine i od tada nije mijenjan niti prilagođavan veoma promijenjenim stanjem na međunarodnom, pa tako i na bh. tržištu rada i zapošljavanja.

Radne migracije su postale standard u svijetu i neophodno je da i Bosna i Hercegovina prati stanje i omogući poboljšanje sistema i efikasnije procedure za potrebe rada i angažiranja stranih radnika u BiH.

Predložene izmjene i dopune u najvećoj mjeri odnose se na unapređenje proceduralnih aspekata izdavanja radnih dozvola, uključujući skraćivanje rokova i pojednostavljenje postupaka. Posebno su značajne odredbe koje predviđaju donošenje liste deficitarnih zanimanja čime se omogućava brže zapošljavanje stranaca u sektorima gdje nedostaje domaće radne snage.

Također, važno je istaći i rješenja koja omogućavaju olakšano zapošljavanje određenih kategorija stranaca, uključujući bivše državljane Bosne i Hercegovine koji su se odrekli bh. državljanstva i kojima bi ove izmjene i dopune omogućile olakšano zapošljavanje u BiH.

Udruženje poslodavaca u FBiH smatra da predložena rješenja predstavljaju korak naprijed ka stvaranju fleksibilnijeg i predvidljivijeg poslovnog ambijenta, te doprinose jačanju konkurentnosti privrede Federacije BiH.

Dom naroda PFBiH usvojio izmjene i dopune Zakona o zapošljavanju stranaca

Dom naroda Parlamenta Federacije Bosne i Hercegovine usvojio je 21.04.2026. godine izmjene i dopune Zakona o zapošljavanju stranaca, čime se uvode efikasnije procedure i jasnija pravila u ovoj oblasti.

Ovim zakonom se, između ostalog, uvode deficitarna zanimanja, odnosno zanimanja za koja nedostaje radne snage među građanima BiH.

Prema predloženim izmjenama, Federalni zavod za zapošljavanje će svake godine do 30. oktobra utvrđivati listu deficitarnih zanimanja za narednu godinu. Za ta zanimanja poslodavci više neće morati prolaziti kroz proceduru provjere da li na evidenciji nezaposlenih postoje domaći radnici koji mogu obavljati taj posao.

Ova lista će se donositi nakon konsultacija s Ekonomsko-socijalnim vijećem za teritoriju FBiH, uz saglasnost Ministarstva rada i socijalne politike FBiH.

Lista će biti zasnovana na osnovu stvarnih potreba tržišta rada, nedostatka određenih zanimanja na evidenciji nezaposlenih, strateškim i investicijskim projektima i drugim faktorima važnim za ekonomski razvoj.

Predložene izmjene uvode i preciznije rokove za produženje radnih dozvola.

Tako će poslodavci zahtjev za produženje morati podnijeti najranije 60, a najkasnije 30 dana prije isteka važeće dozvole. Istovremeno, kantonalne službe za zapošljavanje bit će obavezne donijeti rješenje najkasnije u roku od 30 dana od podnošenja potpunog zahtjeva.

Novina je i mogućnost izdavanja radnih dozvola za radnike koji su se ranije odrekli državljanstva BiH, kao i to da će poslodavci morati prijaviti kantonalnoj službi za zapošljavanje i Službi za poslove sa strancima ako strani radnik dobije otkaz ili ne zasnuje radni odnos. Rok za prijavu je 15 dana.

Izmjene i dopune Zakona o zapošljavanju stranaca u FBiH će stupiti na snagu osam dana nakon objave u Službenim novinama Federacije BiH.

Nove mjere za stabilizaciju cijena osnovnih životnih namirnica u Federaciji BiH



Federalni ministar trgovine Amir Hasičević održao je 16.04.2026. godine u sjedištu Vlade Federacije Bosne i Hercegovine u Sarajevu sastanak s predstavnicima Udruženja poslodavaca u Federaciji BiH, sektor trgovine, na kojem su razmatrane ključne preventivne mjere za ublažavanje inflatornih pritisaka i zaštitu životnog standarda građana.

Iz Federalnog ministarstva trgovine saopćeno je da je u fokusu sastanka bilo definisanje konkretnih modela intervencije na tržištu osnovnih životnih namirnica, imajući u vidu izražene poremećaje uzrokovane energetsom krizom i rastom ulaznih troškova.

Ministar Hasičević je predstavio paket mjera koji se zasniva na tri strateška stuba. Riječ je o zaključavanju marži u veleprodaji (ograničavanje maksimalnih marži na ključne osnovne proizvode kako bi se spriječilo prelijevanje inflatornih pritisaka kroz distributivne lance), potom zaključavanju cijena i/ili marži u maloprodaji (direktna zaštita krajnjih potrošača kroz definisanje maksimalnih maloprodajnih cijena za osnovne prehrambene i higijenske proizvode), te određivanju gornje cijene osnovnih pekarskih proizvoda (uvođenje modela cijene hljeba i osnovnih pekarskih proizvoda po kilogramu, čime se onemogućavaju manipulacije kroz promjene gramaže i naziva proizvoda).

Iz Ministarstva navode da osnovne životne namirnice imaju visoko učešće u potrošačkoj korpi (CPI), što znači da direktno utiču na ukupnu inflaciju, imaju najveći efekat na standard građana, te najviše pogađaju socijalno osjetljive kategorije.

"Zbog toga je cilj mjera precizno targetiranje inflacije tamo gdje ona najviše pogađa građane, uz očuvanje funkcionalnosti tržišta" kazao je ministar Hasičević.

Iz Ministarstva podsjećaju na mjere koje su na snazi, kao i dodatne pravce djelovanja. Riječ je o ograničenju marži u prometu naftnih derivata (0,25 KM/l maloprodaja, 0,06 KM/l veleprodaja), potom mjeri „zaključanih cijena“ za 63 osnovna proizvoda (na snazi do 1. maja 2026. godine), kao i Inicijativi prema Vijeću ministara BiH radi jačanja konkurencije, stabilnosti snabdijevanja i ublažavanja eksternih troškovnih pritisaka.



"Poseban naglasak stavljen je na operativnu saradnju sa Federalnom upravom za inspekcijske poslove, s ciljem dosljedne kontrole primjene ograničenih marži i cijena, sprječavanja zloupotreba i tržišnih distorzija, te jačanje transparentnosti i povjerenja potrošača"

navode u saopćenju Ministarstva. Dodaju da je planirano dodatno unapređenje koordinacije i razmjene podataka radi efikasnijeg nadzora na terenu.

U saopćenju Ministarstva navode da je dogovoreno da će do 1. maja 2026. godine biti finaliziran prijedlog novih mjera, koji će biti razrađen kroz odgovarajući pravilnik o primjeni, uz planirano trajanje mjera od 60 dana, sa mogućnošću produženja u zavisnosti od tržišnih kretanja.

Federalno ministarstvo trgovine nastavlja aktivno djelovati s ciljem očuvanja stabilnosti tržišta, suzbijanja inflatornih pritisaka i zaštite standarda građana u uslovima složenih ekonomskih izazova, saopćeno je iz ovog ministarstva.

Ministar Hasičević s predstavnicima Udruženja poslodavaca FBiH: Produžava se mjera "zaključanih cijena", pripremljena i odluka o ograničenju cijene hljeba



Federalni ministar trgovine Amir Hasičević održao je 28. aprila 2026. godine sastanak s predstavnicima Udruženja poslodavaca u Federaciji BiH iz sektora trgovine, na kojem su razmatrane dodatne mjere zaštite standarda građana i ublažavanja inflatornih pritisaka na tržištu osnovnih životnih namirnica.

U saopćenju Federalnog ministarstva trgovine navode da je na sastanku dogovoreno produženje odluke o "zaključanim cijenama" za 63 osnovna prehrambena i higijenska proizvoda, koja ističe 1. maja, za dodatnih 30 dana.

Istovremeno, Federalno ministarstvo trgovine će u narednom periodu proširiti listu proizvoda obuhvaćenih ovom mjerom, tako da će građanima uskoro biti dostupno ukupno stotinu osnovnih proizvoda sa zaključanim cijenama.

Iz Ministarstva navode da je u pripremi i odluka o ograničenju veleprodajnih marži za grupe osnovnih proizvoda, žitarice, mliječni proizvodi, ulja i masti, šećer, te riža i tjestenina, kao i povrće, higijenski i dječiji proizvodi. Dodaju da je cilj ove mjere spriječiti neopravdana poskupljenja, ublažiti inflatorne pritiske i osigurati dugoročniju stabilnost cijena proizvoda koji su građanima svakodnevno neophodni.

"Federalno ministarstvo trgovine pripremila je i odluku o mjeri neposredne kontrole cijena kojom se određuje najviši nivo maloprodajne cijene pšeničnog hljeba na teritoriji Federacije Bosne i Hercegovine. Prema ovoj odluci, maksimalna maloprodajna cijena pšeničnog bijelog, polubijelog i crnog hljeba iznositi će 4,20 KM po kilogramu, bez obzira na naziv proizvoda. Odluka će se primjenjivati osmog dana od dana donošenja, a važiti će u periodu od 60 dana" navodi se u saopćenju Ministarstva.

Premijer Nikšić i ministar Hrnjić s predstavnicima mljekarske industrije: Zajedničkim mjerama očuvati proizvodnju mlijeka



Premijer Federacije Bosne i Hercegovine Nermin Nikšić i federalni ministar poljoprivrede, vodoprivrede i šumarstva Kemal Hrnjić održali su danas, u sjedištu Vlade Federacije BiH u Sarajevu, sastanak s predstavnicima mljekarske industrije u Federaciji BiH, a na kojem su prisustvovali i predstavnici Udruženja poljoprivrednika FBiH i Udruženja poslodavaca u FBiH. Sastanak je organiziran na zahtjev predstavnika mljekarske industrije, a zbog trenutne situacije u kojoj su se našli zbog stvaranja viškova mlijeka.

Proizvođači su jasno istakli značaj podsticajnih mjera Vlade Federacije BiH i Federalnog ministarstva poljoprivrede, vodoprivrede i šumarstva zahvaljujući kojima je nakon dugo vremena omogućena povećana proizvodnja mlijeka u Federaciji BiH. Ipak, zbog aktuelne globalne situacije s kojom se susreću mnoge zemlje, pa i zemlje u našem regionu, višak mlijeka doveo je do poremećaja u otkupu, skladištenju, održavanju postignutog stepena proizvodnje, kao i plasmana gotovih proizvoda.

Premijer Nikšić i ministar Hrnjić iskazali su puno razumijevanje za situaciju u kojoj se trenutno nalazi mljekarska industrija, te su istovremeno uputili apel predstavnicima ove industrije da otkazivanje otkupa sirovog mlijeka ne bi bilo dobro rješenje. Učesnici sastanka su saglasni da do toga ne treba doći, te da je današnji sastanak organiziran s ciljem pronalaska rješenja za

očuvanje postignutog stepena proizvodnje.


Naglašeno je da je, u sklopu ovogodišnjih rekordnih 190 miliona KM poljoprivrednih poticaja, čak 67 miliona KM predviđeno kao poticaj za mlijeko u okviru kojih su predviđena i dva miliona KM za rješavanje viškova proizvedenog mlijeka.



Kao neke od mjera koje vode ka rješenju nastale situacije istaknuto je sušenje viška mlijeka i pravljenje mlijeka u prahu, a za šta konačno u Federaciji BiH postoji pogon čiju uspostavu je podržalo resorno ministarstvo. U tom kontekstu je razgovarano i o mogućnostima održavanja sastanaka s predstavnicima konditorske industrije koja je dosad uvozila mlijeko u prahu za svoje potrebe. Također, kao jedna od značajnih mjera iskorištavanja viškova mlijeka istaknuta je proizvodnja sira, a za šta su također planirane subvencije resornog ministarstva.

Sagovornici su saglasni da je blagovremno djelovanje od velikog značaja kao bi se brzo i uspješno prevazišlo trenutno stanje, te zaštitila domaća proizvodnja mlijeka i mljekarska industrija.

Odgovor Ministarstva rada i socijalne politike FBiH u vezi neradnih dana povodom 01. maja, Praznika rada



Udruženje poslodavaca u FBiH zatražilo je 24.04.2026. godine mišljenje Ministarstva rada i socijalne politike FBiH u vezi neradnih dana povodom 01. maja, Praznika rada.

Ministarstvo da je dostavilo odgovor u kojem se navodi: "Zakonom o praznicima, koji je na

osnovu Uredbe sa zakonskom snagom o preuzimanju i primjenjivanju saveznih zakona, odnosno Zakona o potvrđivanju uredbi sa zakonskom snagom, primjenjuje kao federalni zakon, propisano je da je Prvi maj Praznik rada i da se obilježava dva dana (01. i 02. maja).

Shodno navedenom, Ministarstvo je informisalo da su neradni dani u FBiH petak 01. maj i subota 02. maj 2026. godine te da se neradni dani ne prenose na ponedjeljak 04. maja 2026. godine.

Dopis Ministarstva možete pročitati [OVDJE](#).

Predstavljen Projekat "Digitalna Europa", jedan od partnera u konzorciju i UPFBiH

Bosna i Hercegovina napravila je važan iskorak u procesu digitalne transformacije ulaskom u program Digitalna Europa i pokretanjem projekta Fusion X, koji je sada dio mreže europskih digitalnih inovacijskih habova (EDIH). Riječ je o projektu koji okuplja institucije, akademsku zajednicu i privredu s ciljem da pomogne malim i srednjim preduzećima i javnom sektoru da usvoje nove tehnologije, posebno vještačku inteligenciju i postanu konkurentniji na tržištu. Već su povučena prva sredstva iz Europske unije, a očekivanja su da bi u narednim godinama taj iznos mogao biti višestruko veći.

Projekt je predstavila Belma Mujdinović, naglasivši da se realizuje uz podršku Europske unije i u saradnji s Ministarstvom komunikacija i prometa BiH.

"Unutar konzorcija imamo jedanaest partnera iz institucija, akademije i poslovnog sektora. Naš cilj je da malim i srednjim preduzećima i institucijama pomognemo da riješe realne probleme u poslovanju i procesima, kroz primjenu novih tehnologija i uz što manji rizik ulaganja u digitalnu transformaciju", istakla je Mujdinović.

Jedan od partnera u konzorciju je i Udruženje poslodavaca u FBiH koji će kroz projekat uvezivati poslodavce s ciljem provođenja sistema digitalizacije u kompanijama.

Ministar komunikacija i prometa BiH Edin Forto naglasio je da je Bosna i Hercegovina posljednja zemlja Zapadnog Balkana pristupila programu Digitalna Europa, ali da je to učinila najbrže nakon podnošenja aplikacije.


"Radi se o ogromnoj količini novca koja stoji u Briselu i čeka da bude iskorištena. Za svaku marku ili euro koji uplatimo, dobit ćemo dvije nazad, ali ne u budžet, nego tamo gdje su najpotrebnije", rekao je Forto.



Pojasnio je da su EDIH-ovi zapravo konzorciji koji okupljaju univerzitete, istraživačke institucije, privatni sektor i državne institucije, s ciljem rješavanja ključnih izazova.

"Jedan od najvećih izazova u BiH je razvoj malih i srednjih preduzeća i njihova digitalizacija. Ona čine 90 posto naše privrede i moramo im pomoći da naprave iskorak. Ako ne prihvate digitalne alate koji se već koriste u Europi, riskiramo zaostajanje", upozorio je Forto.

Dodao je da je BiH već povukla prvih 1,2 miliona konvertibilnih maraka iz ovog programa.



Koordinator projekta i predstavnik Centra za napredne tehnologije Haris Muhić naglasio je značaj uključivanja BiH u program Digitalna Europa, čiji potencijal iznosi 7,6 milijardi eura.

"Naš cilj je da zajedno s partnerima, među kojima su BH Telecom i Verlab, pomognemo malim i srednjim preduzećima i javnoj upravi da postanu konkurentniji. Bez digitalizacije zaostajemo", rekao je Muhić.

Istakao je da je razvoj vještačke inteligencije i novih tehnologija ključan za budućnost poslovanja.

"Moramo se brzo prilagoditi. Razvoj tehnologije danas je toliko ubrzan da između industrijskih revolucija više ne prolaze decenije, već godine", dodao je.

Koordinatorica programa Lela Gurbeta Pokić pojasnila je konkretne koristi za kompanije i institucije.

"Digitalni inovacijski habovi omogućavaju brže usvajanje tehnologija, posebno vještačke inteligencije. Kompanije će dobiti informacije koju tehnologiju koristiti, kako je implementirati, gdje pronaći dobavljače i koje edukacije su potrebne", rekla je.

Dodala je da su usluge već prilagođene iskustvima drugih europskih zemalja.

"Radi se o servisima koji su prošli provjeru stručnjaka iz Evropske unije. Fokus je na edukaciji zaposlenika, testiranju tehnologija i savjetodavnoj podršci, uključujući pristup dodatnim finansijama", naglasila je.

Cilj je, kako je istakla, smanjiti rizik ulaganja i ubrzati procese digitalne transformacije u kompanijama.

Profesorica Ekonomskog fakulteta Univerziteta u Bihaću Diana Vuković naglasila je važnost uloge akademske zajednice u ovom procesu.

"Univerzitet u Bihaću ima dvostruku ulogu – pružanje ekspertize i laboratorijskih kapaciteta za kompanije, ali i rad sa studentima koji će uskoro biti na tržištu rada", rekla je.

Istakla je da digitalna transformacija zahtijeva nove kompetencije.

"Kroz ovaj projekat planiramo prilagoditi nastavne planove i programe kako bismo unaprijedili digitalne vještine studenata i motivisali ih da razvijaju vlastite ideje i startupe", dodala je.

U okviru EDIH-ova posebna pažnja posvećena je i startupima, koji predstavljaju treći ključni segment podrške.

Cilj je jačanje inovacijskog potencijala Bosne i Hercegovine kroz povezivanje znanja, istraživanja i industrije, što bi trebalo doprinijeti razvoju konkurentnije i održive ekonomije.

Ulaskom u mrežu europskih digitalnih inovacijskih habova, Bosna i Hercegovina dobija priliku da ubrza digitalnu transformaciju i iskoristi značajna sredstva iz Europske unije, ali ključni izazov ostaje – koliko brzo će institucije i privreda prepoznati i iskoristiti ovu šansu.

UPFBiH učestvuje u implementaciji projekta "Jačanje veze između politika tržišta rada, javnih službi za zapošljavanje i poslovne potražnje: Procjena svijesti poslodavaca o aktivnim mjerama zapošljavanja u BiH"

Udruženje poslodavaca u Federaciji Bosne i Hercegovine učestvuje u realizaciji projekta "Jačanje veze između politika tržišta rada, javnih službi za zapošljavanje i poslovne potražnje: Procjena svijesti poslodavaca o aktivnim mjerama zapošljavanja u Bosni i Hercegovini, koji se implementira u saradnji sa Međunarodnom organizacijom rada (ILO) periodu od aprila do kraja maja 2026. godine.

Cilj projekta je unapređenje sistema praćenja učinka u okviru LEP II projekta kroz prikupljanje pouzdanih i relevantnih podataka o informisanosti poslodavaca, njihovim percepcijama i iskustvima u vezi sa aktivnim politikama tržišta rada i uslugama javnih službi za zapošljavanje.

Kroz realizaciju projekta poseban fokus stavljen je na procjenu stepena informisanosti poslodavaca o dostupnim mjerama i uslugama, analizu njihove relevantnosti i kvalitete usluga za potrebe poslovne zajednice, kao i identifikaciju ključnih prepreka i nedostataka u saradnji

između poslodavaca i nadležnih institucija, kreiranju preporuka za unapređenje politika zapošljavanja i jačanju učešća privatnog sektora u kreiranju i korištenju mjera zapošljavanja. Na osnovu prikupljenih podataka bit će izrađene konkretne preporuke s ciljem unapređenja saradnje između poslovne zajednice i javnih institucija i jačanja kapaciteta javnih službi za zapošljavanje.



U okviru projektnih aktivnosti, Udruženje će u nekoliko narednih sedmica provoditi anketu među poslodavcima s ciljem prikupljanja podataka o njihovim iskustvima, potrebama i nivou informisanosti o postojećim programima i uslugama zapošljavanja.

Mole se poslodavci da uzmu aktivno učešće u ovom projektu i pomognu prikupljanju podataka ispunjavanjem ankete.

U toku anketiranja, planirano je organizovanje četiri fokus grupe koje će okupiti predstavnike različitih sektora i veličina kompanija. Nakon završetka analize prikupljenih podataka na validacionoj radionici, predstaviti će se i analizirati rezultati istraživanja te identificirati konkretni izazovi iz prakse.

Predsjednik UPFBiH učestvovao na forumu "Neradna nedjelja djeluje"




Predsjednik Udruženja poslodavaca u FBiH učestvovao je 24. maja 2026. godine na forumu u organizaciji Sindikata radnika trgovine i uslužnih djelatnosti Bosne i Hercegovine "Neradna nedjelja djeluje".

Na Forumu je ministar trgovine Federacije Bosne i Hercegovine Amir Hasičević izjavio da Federalno ministarstvo trgovine od Sindikata i Udruženja poslodavaca nije dobilo informacije da su neradnom nedjeljom uzrokovani negativni efekti.

"Dobili smo podatke, vidimo da je promet porastao, čak i tržnih centara, znatno se povećala i dobit. Ova nedjelja, pored socijalnog karaktera, pored ograničavajućeg faktora u radu, ne zalazi direktno u ekonomiju, kako je to na početku izgledalo, promet se rasporedio na ostale dane, i lakše se organizuje unutar preduzeća", kazao je Hasičević.

Ocijenio je da dragstori neće postati trend i najavio je da će se regulisati njihov rad. Govorio je i o mogućnosti da se malim trgovinama dozvoli rad nedjeljom, ali uz uslov da taj dan rade samo vlasnici tih trgovina, a ne zaposlenici.



"Ako se to rješenje usvoji, insistirat ću na tome da se onda ukinu izuzeća. Moram napomenuti da svi koji sada rade nedjeljom prave kriminal jer osim što krše Zakon o unutrašnjoj trgovini, ne izdaju fiskalne račune", naglasio je Hasičević.

Predsjednik Udruženja poslodavaca u FBiH Nihad Imširović smatra da nije pitanje da li nedjelja treba biti neradna, već kako je prilagoditi. Uvjerava da i kompanije imaju koristi od neradne nedjelje.

"Naravno da u Udruženju imamo različite stavove - polarizovalo se na velike i male biznise. Veliki su saglasni i ne postoji velika dilema da li nedjelja treba biti neradna. Neradna nedjelja je donijela benefite radnicima, ali i kompanijama. Dolazim iz tog sektora i nedjelja je uvijek bila najslabiji dan po prihodima i kada je bila radna. Zakonsko rješenje nije nastalo iz hira, ono je zapravo dobro", konstatovao je.

Komentariseo je to što je zakonski omogućeno da trgovine u pojedinim općinama i gradovima, što se prvenstveno odnosi na Orašje, rade nedjeljom.

"To je velika mrlja koju treba ispraviti. O toj fleksibilnosti govorim. Vidimo da je najveći problem što se odluka o neradnoj nedjelji ne poštuje kada su u pitanju male trgovine. Trebamo biti dosljedni i zakonsko rješenje provesti do kraja i ne smijemo dozvoliti da postoje objekti, općine ili male općine koje će biti izuzetak", istakao je Imširović.

Sa Foruma je poručeno da radnici u trgovini u FBiH neće odustati od očuvanja prava na slobodnu nedjelju i slobodan dan na praznike. Sindikalisti smatraju da je to pravo stvar porodičnog života i uvjeravaju da će ostati u fokusu njihovog djelovanja. Ocijenili su da se to pravo može očuvati, kao i da se status radnika može poboljšati socijalnim dijalogom između sindikalista, poslodavaca i vlasti.

Svoja iskustva na Forumu su podijelili i sindikalisti koji predstavljaju radnike u trgovini u Hrvatskoj, Crnoj Gori i Sloveniji, saopćili su iz STBiH.

Direktor UPFBiH prisustvovao obilježavanju jubileja akademika Mirka Pejanovića



U organizaciji Akademije nauka i umjetnosti Bosne i Hercegovine, 20.04.2026. godine održan je okrugli sto povodom 80 godina života i 40 godina naučno-istraživačkog i nastavno-pedagoškog rada akademika Mirka Pejanovića. Skup je okupio 29 učesnika iz zemlje i inostranstva, koji su kroz svoje naučne priloge i diskusije sagledali višedecenijski doprinos akademika

Pejanovića razvoju političkih nauka, ali i njegovu ulogu u ključnim društvenim i političkim procesima u Bosni i Hercegovini. Skup je prisustvovao i direktor UPFBiH Mario Nenadić.

Akademik Pejanović je obnašao sve rukovodeće dužnosti na Fakultetu političkih nauka u Sarajevu – od šefa Odsjeka za politologiju do dekana Fakulteta. Bio je direktor Centra za razvoj lokalne i regionalne samouprave pri Fakultetu, te voditelj istoimenog centra pri ANUBiH. Rukovodio je s pet odsjeka i hiljade studenata. Vodio je računa ne samo o unapređivanju nastavnog procesa već i o obnovi u ratu dobrim dijelom devastirane zgrade fakulteta. Za vrijeme njegovog mandata Fakultet je, i njegovom zaslugom kao dekana, po prvi put dobio akademika. Obavljao je i dužnost prorektora Univerziteta u Sarajevu.

"Prepoznatljivost i važnost akademika Mirka Pejanovića potvrđene su u različitim društvenim i akademskim sredinama. Ono što je najvažnije jeste da je uvijek bio na pravoj strani historije", istakao je akademik Muris Čičić, predsjednik Akademije nauka i umjetnosti Bosne i Hercegovine.

Zahvaljujući se učesnicima, akademik Mirko Pejanović istakao je značaj naučnog podmlatka i kontinuiranog istraživačkog rada, podsjećajući na princip koji je oblikovao njegov akademski put: "Sve što istražiš, sve što napišeš, gledaj da objaviš, tako mi je govorio moj mentor prof. dr. Omer Ibrahimagić, a to govorim i svojim studentima i doktorantima". Posebno je naglasio da bez razvoja novih generacija istraživača nema ni dugoročne perspektive nauke i visokog obrazovanja. Obilježavanje ovog jubileja još jednom je potvrdilo da život i rad akademika Mirka Pejanovića predstavljaju jedinstveno svjedočanstvo spoja nauke, obrazovanja i društvene odgovornosti u savremenoj Bosni i Hercegovini.

Nova članica UPFBiH - Hyundai auto BH d.o.o.



HYUNDAI AUTO BH je bosanskohercegovačka firma osnovana 1997. godine, sa osnovnim ciljem – zastupanje "Hyundai" korporacije u distribuciji vozila istoimene marke. Ovaj cilj zasnovan je na ekskluzivnom ugovoru sa "Hyundai Motor Company" za zastupanje i distribuciju vozila, rezervnih dijelova i opreme istoimenog proizvođača na području Bosne i Hercegovine.

Djelatnost firme je prodaja vozila marke "HYUNDAI" postprodajni servis (uspostava i nadzor nad funkcioniranjem servisne mreže, edukacija servisnog personala, tehnička podrška, opskrba rezervnim dijelovima) iznajmljivanje vozila (Rent a car), kao dopunska djelatnost koja se obavlja vlastitim voznim parkom od oko stotinu vozila.

U periodu od osnivanja, domaćim kupcima je isporučeno više od 5.000 vozila, sa stalnim porastom prodaje. Dobri rezultati postignuti su stalnom brigom i unaprijeđenjem kvaliteta usluge kupcima i korisnicima vozila iz programa HYUNDAI. Veliki doprinos u prodaji Hyundai vozila svakako pruža i prodajna i servisna mreža, prisutna u cijeloj Bosni i Hercegovini.

Hyundai Auto BH je otvorio vrata svog novog prodajno servisnog centra na lokaciji Bare, naselje Šip, (Branilaca Šipa 4c). Novim centrom Hyundai je konačno dobio izgled premium brenda, što zaista i jeste.

Na BH tržištu, Hyundai je vlasnik najvećih priznanja od strane Udruženja automobilskih novinara BiH (UAN BiH). Više o kompaniji pročitajte [OVDJE](#).

Nova članica UPFBiH - Domena d.o.o. Mostar



Društvo "DOMENA" d.o.o. Mostar posluje od 2000. godine. Djelatnost kompanije je izgradnja, rekonstrukcija, sanacija i adaptacija građevinskih objekata u oblasti visokogradnje i niskogradnje, a specijalizirana djelatnost je izrada cementnog estriha.

Kompanija je u mogućnosti pružiti razne građevinske usluge, od izrade cementnog estriha, sanacije krovšta, adaptacije stana, izgradnje kuće do višestambenog objekta. Također grade i po sistemu "ključ u ruke" ili po fazama.

Izvoditi završne radove u građevini zahtijeva visoku prefinjenost i preciznu tehniku izrade, a to se može postići samo sa educiranim stručnim kadrom i najsavremenijom opremom koju kompanija posjeduje.

Više o kompaniji pročitajte [OVDJE](#).



UDRUŽENJE POSLODAVACA

**UDRUŽENJE POSLODAVACA U FBiH
MARŠALA TITA 6, 71 000 SARAJEVO**

TEL: 00 387 33 552 460

FAX: 00 387 33 552 461

MAIL: info@upfbih.ba

WEB: www.upfbih.ba